



Geschichte der geistlichen Stiftungen, der adlichen Familien, so wie der Städte und Burgen der Mark Brandenburg

[Urkunden-Sammlung für die Orts- und spezielle Landesgeschichte]

Riedel, Adolph Friedrich

Berlin, 1858

CCCXLVI. Die Vicarien der Peterskirche zu Stendal verkaufen einem Domherrn des Nicolaistiftes eine Rente, die nach seinem Tode zu Memorien für ihn und für die Feier des Festes mehrerer Heiligen ...

Nutzungsbedingungen

[urn:nbn:de:hbz:466:1-54890](https://nbn-resolving.org/urn:nbn:de:hbz:466:1-54890)

CCCXLV. Curd von Runtorp verkauft den Vicarien der Marienkirche in Stendal Gebungen auß Meseberg wiederkäuflich, am 2. April 1459.

Ik Curd van Runtorpe, knape, to hindenborch wonafflich, Sakeweldige, Bekenne openbar bethughende med dessem briue vor allen luden, de en sehn, horen edder lesen, dat ik nach guden berade vnde med willen vnde sulbord mynes broders Hans van runtorp vnd Ermbrecht van runtorp, mynes vedders, beide wonafflich to yden, vor my vnd myne eruen Rechtes copes vorkofft hebbe vnd vorkope ok in crafft disses briues den Erhaftigen heren, allen behndten vicarien in vnser liuen frowen kerken to Stendal, de nu sint, vnd allen oren nakamelingen, vicarien, desse nachreuen renthe in dem dorpe to meseberge: Ouer peter bollen hoff, huben, acker, wische, wurde vnd Holte achteynde haluen schillinge stendalscher weringe; Ouer Claus schrodors hoff, huben, acker, wische, wurde vnd holte Negen schillinghe myn dre penninge; Ouer Heyne fredericks hoff, huben, acker, wische, wurde vnd holte Negen schillinge myn dre penninge, Alle stendalscher weringe, jarliker renthe, vor virteyn mark penninge der suluen weringe, de my de gnanten herrn wol to genoge betalet hebben etc.: vnd to merer bewaringe hebbe ik vpgnante Curd van runtorp den gnanten vicarien dar vor to borge gefat de duchtigen Elges van runtorp vnd diderick van runtorp, brodere, wonafflich to vleffow, myne veddern etc. — vnd dessis to forderer bekantnisse hebbe ik vpgnante Curd van runtorp, sakeweldige, vor my vnd myne eruen myen ingesegele vnd wy Hans van runtorp vnd Ermbrecht van runtorp vor vns vnd vnse eruen vnse ingesegele, Ok wy Elges vnd diderick, genant van runtorp, borge, vnse ingesegele alle met witschap vnd willen an dessen briue laten hengen, de gheuen is Nach der bord Cristi vnser Herrn dusent virhundert in dem negen vnd vestigsten Jare, amm mandage na dem sondage, so de hilge kerken singet Quali modo geniti.

Nach dem Original in Pfarrarchive der St. Marienkirche No. 21.

CCCXLVI. Die Vicarien der Peterskirche zu Stendal verkaufen einem Domherrn des Nicolaisstiftes eine Rente, die nach seinem Tode zu Memorialen für ihn und für die Feier des Festes mehrerer Heiligen verwandt werden soll, am 23. April 1459.

Wy leonardus Moringk, Rigmannus Rigmanni, Johannes Infell, Hinricus kolk, Johannes doringk, petrus radenfleue, vicarii in der kerken Sancti Petri in stendal Halberstades gestyctes, Bekennen vnd betughen in dessen vnser apenbryue vor alsueme vnd vor allen, dy dessen Breff syn, lesen edder horen lesen, dat wy vor vns vnd all vnse nakamelinge vorkofft hebben vnd vorkopen in Crafft dusses Breues deme erfamen Hern, Eren Hinrik wulfenger, Canonico in der kerken Sancti Nicolai Tho stendal, Twyntyck scyillingk penninge stendaliker weringe in jarliker rente vnd Tinsc in vnser wyffesten vnd redesten gemeynen guderen, de vns vnd vnse nakamelinge vicarien in vnser meynen memorialen vnd gedechtnyszen anvalen mogen vnd hebben, alle Jar ene wol thobetelende vnde tho danken geuen vppe Sancti Georgi

dage des hillgen mertelers, ane vortogeringe, Infall edder geuerde, vngehindert alles geystlikes edder werlikes gerichtes. Dar vor hefft de gnante ern Hinrick wulfenger vns vor vns vnd all vnse nakamelinge gegeuen vnd wol betalt an redeme auertelden gelde vyff vnd twyntygh gude Reneske gulden, De all gantz In vnfen vnde In al vnser nakamelinge vicarien gemeynen memorien vnd dechnyssen gudern gebracht synt, angelecht vnde vthgeheuen, der wy em quyth vnde lofz seggen vnde Quytiren em in craft dusses bryues. Wen auer de vppgnante Her Hynrik wulfenger nba willen des almechtigen gades affgeyt van dodes wegen, deme jo god geue eyne salige stunde, so wil wy gnanten leonardus Moryngk, Ricmannus Rigmannus (sic), Johan Infell, Hinrik kolk, Johannes doryngk, Petrus Radenfleue, vicarii in der gnanten kerken Sancti petri tho stendall, vnde all vnse nakamelynge scollen alle Jar tho ewygen tyden in deme dage syner vorseydinge holden vnde began jarlike memorien vnde dechnissen In gnaden vnde saligeit syner leuen selen, syner olderen, brodere, liffhebber vnde alle crysten selen in vigilien, missen vnde commendacien, dat en allen god genedich sy vnde barmehertich, vnd scryuen em vnde syner Oldern vnde syne Brodere in vnfen doden brefft vnde annhemem em in vnse broderfcoep mede deylestich alle vnser guden werken, de nu scken vnde in thokamenden ewigen tiden: vnd wy willen vnde alle vnse nakomelinge in der memorien distribuieren vnde deylen viif scylling penninge der gnanten stendeliker were den vicarien vnd prestern in der affvesenden vicarien stede vnd weme dar aff wes behoren moghe, alze kosten vnde dyneren der kerken Sancti petri, In aller besten wyse, alze wy mank vnfen vicarien vnde presteren plegen tho holdende. Vortmer wil wy gnanten vicarien vnd alle vnse nakamelinge scallen holden vnd began tho ewigen tiden desse nhascreuen dry fest, vthgenomet festen Odilie, appolonye vnde gertrudis der hilgen Junefrouen, vnde in eynem jewelken feste den vicarien edder den presteren in orer stede vnde dyneren der kerken distribuieren viif stendeliske scyllinge, anthoheuede nha Syner vorseydenge vnd nha synem dode, gantz vaste vnde ewichliken tho holdende. In wisheyt vnde mer thuchnisse der vorcreuen betalinge vnde nha syner vorseydyngge memorien vnde alle jerlike dechnisse vnde dy dry benomeden feste appolonie, Odilie, Gertrudis vnd alle vorcreuen articlen vnde Inholdyngge dusses bryues stede vnd vaste gantz stuliken thoholdende vnd thobegande in thokamenden ewigen tyden hebbe wy vorcreuen leonardus moringk, Rigmannus Rigmanni, Johannes Infell, Hinrik Colk, Johann doryngk, petrus radenfleue, vicarii in der gnanten kerken Sancti petri In der kerken tho stendall, vor vns vnde alle vnse nakamelinge den erfamen eren Hinrik wulfenger dessen breff gegheuen, vorsegelt meth vnsemem gemeynen vicarien angehangeden Ingefegell, vnde leonardus Moringk vnde Johannes Infel, vnse mede vicarien, van vnser bede wegen ore Ingefegell wiliken mede angehangen. Gescruen in deme Jare Cristi Geborth virteynhundert Jar In deme negen vnde vefstigsten Jare, In Sancti Georgi dage des hillgen mertelers.

Nach dem Originale des Pfarrarchives der Peterskirche.